

Date – 15/05/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Mizoramah a bik taka electoral roll enawna, Special Intensive Revision chu May ni 30 atanga June ni 28 inkarah neih a ni dawn.

2. Union Minister of State for Consumer Affairs, Food and Public Distribution Pi Nimuben Jayantibhai Bambhaniya chuan nimin khan Mizoram alo zin a, a cham chhung hian sawrkar laipui scheme hrang hrang leh tualchhung hmasawna dinmun a enfiah ang.

3. Home Minister Pu K. Sapdanga'n sawrkar hna lakah dik leh langtlang taka kalpui ani tih sawiin department hrang hrang tuam chak mek zel ani tih a sawi.

4. Prime Minister Narendra Modi-a chuan India kaihhruaina hnuaiah BRICS chuan thawhona chak, hmasawna tluantling, eibar zawna ngelnghet leh mitin lenna khawvel kalphung tha nei turin an thawkho zel dawn a ti.

<><><>

SPECIAL INTENSIVE REVISION

Mizoramah a bik taka electoral roll enawna, Special Intensive Revision nei turin tun thla tawp May ni 30 atanga June ni 28 inkarah in tinah Booth Level Officer (BLO) an kal dawn a, hemi hun chhung hian chhungtinte chu zin chhuak lova, mahni ina awm hram turin Chief Electoral Officer Dr. Lalrozama'n a chah.

Nimin tlaia Aizawl Press Club-a thuthar thehdarhtute an kawmnaah he thu hi sawiin, Mizoram Chief Electoral Officer Dr. Lalrozama chuan tun tuma Election Commission of India thupek anga Special Intensive Revision an neih tur chu kum tina Electoral Revision pangngai neih thin mitthi paih leh telh thar ang kha a ni lo a ti a. Tun tuma Electoral Roll enawna chu kum 20 dana neih thin niin, thuk zawk leh changtlung zawka neih tur a ni a ti a, BLO te'n enumeration card nen chenna in tin an tlawh dawn a, district lam pawh hrilhhriat an ni tawh a ti a. CEO chuan kumin July ni 5 ah draft electoral roll tihchhuah a ni dawn tih sawiin, Special Intensive Revision nei tur hian tun thla tawp May ni 30 atanga June ni 28 inkarah in tinah Booth Level Officer (BLO) an kal dawn a, hemi hun chhung hian chhungtinte chu zin chhuak lova, mahni ina awm hram tur leh hun lo insiam turin a ngen a, hei bakah

hian mobile app -ECINet download turin mi tinte a ngen bawk a. He app hmang hian kum 2005 Intensive Revision ah voter ten an hming a chuan leh chuan loh an en thei a, BLO biakpawh theihna, complaint thehluhna leh thil dang tam tak atan a chhawr tangkai theih a ni.

<><><>

HEROIN SEIZED

Vairengte SDPO kaihhraina hnuaiah Nilaini zing khan Vairengte Sub Division Anti Drug Squad Team-in North Chhimluang leh a chhehvelah Heroin tamtham tak an man a, Ruihhlo hi cheng nuai 180 chuang man vel nia chhut a ni.

Nilaini khan Vairengte-a Police te chuan Ashok Leyland Truck atangin Sahbawn bawm 70 a dah Heroin Gram 900.29 an man a, lirthei dang an enfel laini truck khalhtu leh an handyman te chu lo bibo in police te chuan an lirthei ngon zawka an enfiah hnuah Ruihhlo hi hmuh a ni.

<><><>

UNION MoS VISITS MIZORAM

Union Minister of State for Consumer Affairs, Food and Public Distribution Pi Nimuben Jayantibhai Bambhaniya chuan nimin khan Mizoram alo zin a, a cham chhung hian sawrkar laipui scheme hrang hrang leh tualchhung hmasawna dinhmun a enfiah ang.

Ni 5 cham tura lo zin Union Minister hian nimin khan Lengpui Airport a lo tum hnuin Khawzawl District a tlawh nghal a, Khawzawl district-a ni hnih a cham chhungin, PDS outlet (ration semna), District Hospital, Anganwadi centre, primary school leh NH-06 kawngpui siam mek te a enfiah ang. Chawngtlai khuaa PMAY(G) hnuaiia chenna in sate leh Self-Help Group member-te a kawm bawk ang a, Khawzawl DC nen hmasawna hnathawh hrang hrangte an sawidun dawn bawk.

Minister hi May ni 16-ah Aizawlah a kir leh ang a, May ni 17 khian Chief Minister Pu Lalduhoma nen an inkawm dawn a, Sairang leh Bairabi Railway Station te a tlawh dawn bawk a ni.

<><><>

KOLASIB FAST TRACK COURT

Kolasib Fast Track Court chuan Methamphetamine phurtu Vanlalfela (kum 23), Zokhawthar, Champhai District chu thiam loh a chantir a, hrehawm taka kum 10 chhung jail tang tur leh cheng nuai khat chawi turin a hrem.

Court thuremnaa tarlan a nih danin, kum 2025 February ni 25 khan Vairengte police ten Car pakhat hmangin mi pakhatin Zokhawthar lam atanga Bagha, Assam panin Methamphetamine a phur tih thu an dawn bawhzuiin Vairengte police check gate-ah he motor hi an lo man a. Car kawngkhar 4 chhunga Methamphetamine fun

20 thuhruk chu an hnu chhuak a, motor khalhtu Vanlalfela leh a thianpa Zingengmawia (kum 27), Zokhawthar nen an man a ni.

Police-in ruihhlo an man hi Kg. 23.41 a ni a. Thubuai ngaihtuahtu Kolasib Fast Track Court Judge Pu R. Vanlalena chuan, thuhrethute thusawi leh finfiahna hrang hrang atangin ruihhlo phurhna a mawh phur bertu Vanlalfela chu thiam loh a chantir a. Hrehawm taka kum 10 chhung jail tang tur leh cheng nuai chawi turin a hrem a, sum chawi tur hi a pe thei lo a nih chuan thla 6 dang a tan belh a ngai dawn a ni.

<><><>

HOME MINISTER

Home Minister Pu K. Sapdanga'n sawrkar hna lakah dik leh langtlang taka kalpui ani tih sawiin department hrang hrang thuam chak mek zel ani tih a sawi.

Nimina Police Training School, Thenzawla hmasawna ruhrel hrang hrang a hawna ah he thu hi sawiin Pu K. Sapdanga chuan hna lak kawngah dik leh langtlang taka kalpui ani thin tih sawiin Mizoram tana Police tha tak leh thiam tak lak zel annih a beisei a ti a, department thuam chak mek zel anih thu a sawi.

Minister chuan tunlai thiamna hmangin hmangin hmasawna hrang hrang kalpui mek ani tih sawiin Police Department in "Year of Discipline" programme thar a kalpui chu hmalakna tharin nasa takin a puih ngei a beisei tih a sawi.

<><><>

KHAWZAWL SUB-YMA

Ni 2 awh tur Sub-Hqrs YMA inkhawmpui vawi 2-na chu nimin atangin Khawzawl Vengthar Br. YMA Hall-ah tan a ni a, rampumah social media hman dan dik inzirtir anih theih nan Central YMA in hma la rawh se tih an rel.

Nimina rorel inkhawmah hian Agenda 15 a lut a, Agenda lut zingah hian YMA kaihhnawih 7, Central YMA kaihhnawih 4 leh Sawrkar kaihhnawih 7 a lut a. CYMA kaihhnawih Agenda lut zingah Rampumah Social Media hman dan dik in zirtir a nih theih nan CYMA in hma la rawh se tih leh Mizo tawng chu sawrkar thuchhuak leh thil tihna kawng hrang hrangah uar zawka hman ni rawh se tih bakah Central YMA in aia upa zah inzirtirna kawngah tun aia chak zawkin hma la rawh se tih te a tel a. Sawrkar khawih Agenda lut ah Khawzawl hmasawna tur hrang hrang sawiho a ni bawk.

YMA Sub Headquarters Khawzawl inkhawmpui vawi 2-na hi vawiinah Chief Minister Pu Lalduhoma chuan khuallian niin a hmanpui dawn a ni.

<><><>

KOLASIB SUB-HQRS YMA

Kolasib Sub-Hqrs YMA Coordination Committee chuan Sorkar in ILP a kalpui mek chu kimchang leh khauh zawka hman anih theih nan sorkar ah thlen nise tih an rel.

Nimina thutkhawmah hian Mizoram Tribal list ennawn a nih theih nan Central YMA CEC ah thlen nise, an ti a. Sorkar in ILP a kalpui mek chu kimchang leh khauh zawka hman anih theih nan sorkar ah thlen nise an tih bakah Sub-Hqrs YMA huam chhunga ramri Check gate neihna hmun khua ah Bazar ni in ILP ngawrh zawka check thin ni se an ti a. ILP Cell leh Police Checkgate hmunhma tur ramri hrul Vairengte ah 4-lane kawngpui laih zawh hma ngeiin Mizoram sorkar in ruahman fel se an duh thu sawiin an thurel te sawrkara thlen an rel a ni.

Kolasib Sub-Hqrs YMA thukhawm hian Luidung leh ramngaw humhalh kawngah chak zawka hmalak an rel bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

NMBA HRISELNA KUTPUI

Ni 2 chhung awh tur NMBA-Hriselna Kutpui chu nimin khan Serchhip ah buatsaih a ni a, damlo tam tham tak a thlawin an inentir.

Nasha Mukh Bharat Abhiyaan (NMBA) Serchhip District hmalakna a ‘NMBA-Hriselna Kutpui’ ah hian Serchhip DC Office Complex-ah Aizawl leh Serchhip Hospital a Doctor thiambikna nei hrang hrangte chu mipuite tan rawn theih tura thu in, inentir bakah damdawi a thlawna pek vek an ni a, Medical Screening-Blood Sugar,Blood Pressure leh HIV Test te chu a thlawna tihsak anni a, Serchhip leh a chhehvel ami hrang hrang ten an hlut hle a, damlo tam tham tak an in entir a ni.

<><><>

BRICS

Prime Minister Narendra Modia chuan India kaihhruaina hnuaiah BRICS chuan thawhona chak, hmasawna tluantling, eibar zawna ngelnghet leh mitin lenna khawvel kalphung tha nei turin an thawkho zel dawn a ti. Nimina BRICS Foreign Minister meeting-a palaite nen an inkawmnaah he thu hi sawiin Pu Modia

chuan BRICS chu ram thangmekte tana thawhhona pawl tha tak a ni chho mek a ti a. Khawvel chhim lam ramte tana aw chhuahtu ber anih thu a sawi a ni. PM Modia Minister kawmte zingah hian Russian Foreign Minister Sergey Lavrov, Iranian Foreign Minister Abbas Araghchi, South African Foreign Minister Ronald Lamola leh Brazilian Foreign Minister Mauro Vieira te pawh an tel a ni.

Puan tawh angin ni hnih aw h BRICS Foreign Ministers' Meeting chu nimin khan New Delhi-ah tan a ni a. He thutkhawm hi External Affairs Minister S Jaishankar chuan a kaihruai a. Thusawiin Dr.Jaishankar-a chuan khawvelin remna leh muanna a mamawh reng a ti a. Tunhnaia hmun thenkhatah innghirnghona thleng chuan inbiakna leh indawrna neih pawimawh zia a tilang a ti bawk. BRICS Foreign Minister te leh Member leh thawhpui ram atangin palai thahnem tak an kalkhawm dawn a.

<><><>

US-CHINA

US President Donald Trump leh China President Xi Jinping te chuan Strait of Hormuz hawn chhonzawm zel leh zalen taka tuialhthei leh a dangte phurh chhonzawm an remti. President Trump-a leh Xi Jinping te hi nimin khan Beijing ah an inkawm a. US leh China inkarah sumdawna, technology leh venhimna lamah inepna boruak awm mahse thawhdunna tha zawk neih chungchang an sawidun a. Tun tum hi President Trump-an a vawihnih nana President anih hnua China a tlawh hmasak ber a ni a.

President Xi Jinping-a chuan China-in US nena thawhdunna tihlen zel a duh thu sawiin inep lova tangdun tur an nih thu a sawi a. Pu Trump-a pawhin US-China inlaichinna chu ahma zawng aain a tha dawn tih a sawi a ni.

<><><>